

Պետրոս Մեծը մեծ եռանդով ոյժ տուեց Օրիի գործունէութեան :

Նման մի ծրագիր փորձեց իրականացնել Ե՛ւ Եկատերինա Բ. կայսրուհին՝ ծրագրելով հայկական թագաւորութեան ստեղծումը : Հայաստանի դահի թեկնածու էր իշխ. Պոտեոմկինը եւ... նոյնիսկ ապագայ հայկական թագաւորի սեղանի անօթներն էին ապսպրուած :

Վերջապէս, նման միտք էր ղեկավարում քաղաքական գործիչներին եւ վերջին, համաշխարհային պատերազմի ընթացքին, երբ մշակուում էին ընդարձակ ծրագրերնէր հայկական պետութեան, որը պէտք է Փոքր Ասիան բաժանէր երկու մասի. եւ Թիւրքիան զատէր մնացած մահմեդական աշխարհից :

VI

ԼՎՈՎԻ ՔԱՂԱՔԱՅԻՆ ԿԱԶՄԸ ԵՒ ՀԱՅԵՐԸ

Լվով քաղաքի վարչութեան գլուխ կանգնած էր վոյթը, որ սկզբում նշանակուում էր լեհական թագաւորի կողմից : ԺԵ. դարի առաջին կիսին Վլադիսլաւ թագաւորը իր իրաւունքը գիջեց քաղաքային վարչութեան — rada, որին անցաւ վոյթ ընտրելու իրաւունքը :

Քաղաքային վարչութիւնը՝ rada-ն, բաղկացած էր 12 անդամից (consules), որոնք ընտրուում էին ցմահ : Նրանք բաժանուում էին երկու խմբի՝ վեցական հոգի : Մի տարի գործում էր մէկ խումբը (consules residentes), իսկ միւսը (antiqui) հանգստանում էր : Յաջորդ տարի antiqui դառնում էին residentes, իսկ residentes հանգստանում էին :

Նրանք էլ իրենց միջից ընտրում էին երեք քաղաքապետներ (bourgmeister), որոնք պաշտօնավարում էին հերթով, իւրաքանչիւրը մէկ ամիս, եւ քաղաքային գործերի բարձրագոյն իշխանութիւնն էին հանդիսանում :

Քաղաքային վարչութիւնից յետոյ գալիս էր collegium scabinale, որ բաղկացած էր 12 scabin-ներէից, որոնց ղեկավարում էր վոյթը՝ ընտրուած ռադայի կամ scabin-ներէի միջից մի տարի ժամանակով : Scabin-ները ունէին դատական իրաւասութիւններ. նրանք կազմում էին քաղաքային դատարանը :

Այս երկու հիմնարկութիւններն էլ՝ կազմուած ցմահ ընտրուած անդամներէից՝ շատ շուտով վերացուեցին հակաիշուի չենթարկուող մի սակաւաապետութեան, որովհետեւ վարչութիւնն էլ, դատարանն էլ ամփոփուեցին հարուստ քաղաքացիներէի սակաւաթիւ խմբակի ձեռքը :

Այս ինքնագլուխ գործունէութեան դէմ պայքարելու նպատակով, Ստեփանոս Բատորի թագաւորը (1576-1580) կեանքի կոչեց մի նոր հիմնարկութիւն՝ 40 այրեր (ordo quadraginta virorum), որոնց կէսը ընտրուում էր քաղաքի վաճառականներէից, իսկ միւս կէսը՝ արհեստաւորներէից : Այս հիմնարկութիւնը եւ, ի մասնաւորի 40 այրերի ամէն տարի ընտրուող տեղակալը (regent), իրաւունք ունէր հակաիշուի ենթարկելու քաղաքային վարչութեան հասոյթները եւ միջնորդ էր հանդիսանում քաղաքացիներէի ու քաղաքային վարչութեան միջեւ : Տեղակալը յիշեցնում էր հոովմէական ժողովրդական տրիբունին :

Այս հիմնարկութիւնները ծառայում էին Լվով քաղաքի, գերազանցապէս լեհ, աւելի ճիշտ, կաթոլիկ ազգաբնակչութեան առօրեայ կարիքներին : Իսկ ինչ վերաբերում է Լվովում ապրող ուրիշ տարրերին, այսինքն՝ հայերին, ռուսիներին ու հրէաներին, ռուսիները ենթարկուած էին քաղաքային դատարանին, հըրէաները՝ արքունական պաշտօնէից դատարանին, իսկ հայերը ունէին սեփական դատական հիմնարկութիւններ՝ բաղկացած հայ ժողովրդի աւագներէից, որոնք ղեկավարում էին հայերի ներքին կեանքը եւ դատաստան էին անում : Նրանց էին ենթակայ հայերի միջեւ ծագող բոլոր դատական գործերը, այլեւ հայերի եւ օտարների միջեւ առաջ եկած այն դատերը, երբ ամբաստանեալը հայ էր :

Հայ աւագները թուով 12 հոգի էին : Նրանց գլուխ կանգնած էր վոյթը, որը սկզբում ընտրուում էր հայերի միջից եւ հայերի կողմից : Արդէն Ժ՛՛ դարի կէսերին պատահում են ցուցմունքներ, որ հայերն ունէին սեփական վոյթ, որը հայ ժողովրդի ինքնավարութեան պետն էր եւ հայերի ներկայացուցիչն ու պաշտպանն էր Լվովի քաղաքային եւ արքունական հիմնարկութիւններէի առջեւ :